

CEO di Ahata Jim Hepple:

The Riu Palace Antillas lo habri october

ORANJESTAD - Sr. Jim Hepple, CEO di AHATA, a comenta cu e tabata den combersacion cu e manager di Riu aki na Aruba pero tambe di afo. For di e combersacionnan aki a wordo informa cu The Riu Palace lo ta cla pa apertura den luna di october di e aña aki na lugá di 2015, manera tabata palabra anteriormente". Ya bishitantenan por haci reservacion.

Sr. Hepple a bisa cu e ta sumamente contento cu e hotel lo habri prome cu e periodo halto. Ya caba personanan interesa por subi riba internet riba e website di Riu y book hotel desde memey di october, segun sr. Hepple. Esaki ta algo sumamente interesante pa Ahata mirando cu ta 481 camber e hotel aki lo habri, esaki ta importante pa e cantidad di bishitante cu Aruba ta haya, el a enfatisa.

Mirando cu e ta un producto di prome calidad e tin su grupo cu esaki ta atrae, pues adulto solamente. Sr. Hepple a bisa cu e hotel aki ta bay ta mas caro cu e otro Riu Palace, pero a enfatisa cu su apertura tin demanda pe y ta un bon noticia pa e industria aki.



Kico lo sigui awo

A puntra sr. Hepple si tin otro desaroyonan cu e hotel lo continua awo. El a bisa cu siguiientemente e posibilidad ta cu nan lo drecha algun cos cu mester a drecha na e Riu Palace anterior cual ta poco bieu pa asina pone esey tambe na un standard mas halto. Loke lo sosode exactamente no ta sigur, sr. Hepple a bisa. "Probablemente pa cuminsa nan lo renoba un 150 camber

otro aña, hecho ta cu e hotel ta contento cu Aruba y lo keda den direccion di renovacion of ampliacion pa mehora nan servicio"

Speransa di e hotel nobo

Manera Bon Dia Aruba a publica den e matutino di dia 23 di mei e intencion tabata pa e hotel habri den periodo di winter 2014 of 2015, esaki tabata para riba e pagina di Riu Palace riba internet bou di The Riu Palace Antillas.

Ya for di e periodo ey Bon Dia Aruba a tuma nota cu ya propaganda a cuminsa wordo haci internacionalmente pa e hotel nobo aki.

Informacion riba website

Riba e website hotel online, travel weekly, trip advisor, arke.nl pa menciona algun, ta wordo propaga cu RIU Hotels & Resorts a anuncia un incorporacion di un di dos hotel ariba e isla di Aruba en trante winter 2014 of 2015.

The Riu Palace Antillas lo ta situa banda di Riu Palace Aruba, ariba Palm Beach. Manera sr. Hepple a confirma, e hotel lo ta exclusivamente pa 18 aña bay ariba. Segun e website hotel-online RIU Palace Antillas lo draai cu un programa di 24 ora, servicio nan luhoso disponibel cu ta encera un glas di champaña na momento di yegada, servicio 24 ora na camber y Wi-Fi gratis rond di e hotel.

The Riu Palace Antillas ta enrikece nan productu ariba e bunita isla di Aruba, un destinacion caminda cu na 2007 a habri Riu Palace. E website di hotel-online ta sigui splica cu e hotel nobo aki tin 481 camber, restaurant cu buffet cu cuminda internacional y tres restaurant cu diferente specialidad. Clientenan di e hotel lo por disfruta diferente bebida na cualkier un di e barnan den e hotel, incluyendo banda di pool.

Como un extra atraccion banda di tur local Riu Palace Antillas lo tin pa ofrece, e huespednan di Riu Palace Antillas lo por haci uzo di e facilidadnan di Riu Palace Aruba. Esaki como cu nan ta keda banda di otro, a wordo menciona riba e website. □